

baginda menjadi Yang Dipertuan Negeri Sembilan dahulu dan dibuat dengan *shakhṣiyah*. Kita tidak akan berkata apa-apa jika yang demikian itu dibuat secara peribadi oleh Seri Paduka Yang Maha Mulia Tuanku Abdul Rahman bin al-Marhum Tuanku Muhammad tetapi kita terpaksa berkata-kata dan mengingatkan perkara ini jika dilakukan dengan sifat baginda sebagai Seri Paduka Yang di-Pertuan Agong kerana umat Islam umumnya terasa dukacita jika Seri Paduka itu sendiri menjadi seorang yang melanggar perkara-perkara yang tidak disenangi oleh umat Islam yang dilakukan di hadapan umum.

Kita yakin bahawa umat Islam sangat bersedih hati atas kejadian ini dan umat Islam terasa benar bahawa seolah-olah Islam agama rasmi itu jadi permainan, kepada suatu masa di dalam masjid, dan pada suatu masa di majlis-majlis yang tidak diperkenan mereka dan tidak menyenangkan pemandangan mereka seperti yang pernah dikatakan oleh al-Ustādh Zulkifli Muhammad.

Yang telah lalu itu sebenarnya tidak dapat diperbaiki lagi tetapi seyogialah hendaknya yang telah lalu itu dijadikan penyelidikan tentang perasaan hati rakyat yang beragama Islam semoga dapatlah kiranya penasihat-penasihat Ke bawah Duli Seri Paduka menyampaikan perasaan dukacita rakyat yang beragama Islam ke atas peristiwa itu. Kita berharap tidaklah ada lagi kelak peristiwa-peristiwa yang serupa itu berlaku kerana jika berlaku juga bermakna menghilangkan kepercayaan umat Islam.

Kita buat rencana ini tidaklah sebagai bidasan tetapi adalah kita hadapkan untuk menyampaikan perasaan, perasaan yang kasih dan taat setia semoga di dalam perjalanan-perjalanan masa akan datang hiduplah perasaan rukun dan damai pada hati rakyat-rakyat yang beragama Islam. Kita berharap

semoga dapatlah Allah memberi taufik dan hidayah-Nya supaya kita berkeadaan biasa di dalam tegur menegur dengan ikhlas untuk kebaikan bersama – Amin.

Islam dengan Kebudayaan Melayu

Salah satu keputusan yang diambil oleh Kongres Kebudayaan Melayu di Melaka pada bulan September 1957 dahulu ialah yang dinamakan kebudayaan Melayu itu ialah kebudayaan yang tidak bertentangan dengan agama Islam. Keputusan ini diambil, kita percaya, ialah setelah mengetahui bahawa agama Islam ialah agama rasmi bagi Persekutuan Tanah Melayu.

Yang disebut dengan kebudayaan, menurut pendapat kita adalah meliputi di atas tiga perkara: 1) bunyi, 2) perkataan, dan 3) mengenai perbuatan (termasuk dalam hal pakaian dan seumpamanya).

Telah sepuluh bulan lamanya berjalan kongres itu hingga hari ini tidak seorang pun ulama-ulama Islam yang bangun atau tampil ke hadapan untuk menerangkan apakah sempadan adat istiadat Melayu atau kebudayaan Melayu yang sedang berjalan yang menyentuh atau bertentangan dengan agama Islam terutamanya pertentangannya yang membawa kepada syirik.

Kita berasa telah tiba sangatnya bagi Majlis-Majlis Agama dan Adat Istiadat Melayu di negeri-negeri Persekutuan Tanah Melayu membuat masalah-masalah yang mengenai perkara-perkara kebudayaan-kebudayaan yang ada sekarang untuk dikaji bersama di dalam hal yang mengenai tiga perkara tadi iaitu bunyi, perkataan dan perbuatan yang ada dijalankan di dalam istiadat-istiadat Melayu masa ini.

Kita cukup mengetahui bahawa agama tidak menegah kepada kaedah-kaedah yang disebut dengan seni bunyi asalkan

sahaja seni bunyi itu tidak bertentangan dengan kehendak dan tujuan agama dan ia tidak menyerupai bunyi peribadatan agama lain. Rasulullah sendiri pernah memuji seorang sahabat yang sangat merdu suaranya dalam membaca al-Qur'an sehingga Rasulullah mengatakan sebagaimana beliau mendengar Nabi Dawud membaca Zaburnya.

Begitulah kegemaran beliau yang maknanya beliau tidak menegah atas seni bunyi tetapi bagaimanakah keadaannya kalau kita memerhatikan bunyi nobat yang dibunyikan di dalam istiadat-istiadat raja-raja Melayu kalau kita banding iramanya dengan bunyi peribadatan orang-orang Hindu? Kita berkeyakinan bahawa perkara ini akan menimbulkan tegahan jika perkara menyerupai itu boleh membawa kepada syirik. Kerana itu kewajipan ulama mengadakan penyelidikan dalam perkara ini.

Di sebalik itu, di dalam seni suara itu ada pula timbul syair-syair yang syirik disiarkan menerusi radio Malaya dan wayang gambar yang tidak disedari menanamkan semangat yang membawa kepada perkara-perkara mencapik Tuhan seperti perkataan "Oh Tuhan mengapa Engku Oh Maha Dewata, Maha Brahta" iaitu perkataan-perkataan menempelak Tuhan, perkataan-perkataan memuja dewa-dewa yang menurut agama, sepanjang yang kita ketahui sama ada diketahui atau tidak diketahui, sama ada disengajakan atau tidak di sengaja bahawa yang demikian itu mendatangkan syirik.

Selain banyak pula perbuatan-perbuatan yang termasuk di dalamnya mustahak diselidiki adakah ia syirik atau tidak iaitu seperti di dalam adat menjunjung duli dan adat menghadap kepada raja dengan menyusun jari-jari tunduk dan seumpamanya iaitu adakah ia mengenai kepada rukuk atau sujud padahal rukuk dan sujud itu menurut Islam hanya tertentu kepada Tuhan semata?

Banyak lagi perkara-perkara yang seperti ini, yang wajib bagi mufti-mufti di Persekutuan Tanah Melayu menyiasat, menghalusi dan memberi fatwa di atas supaya kalau ia tersalah, janganlah hendaknya kesalahan itu berkepanjangan dan terus menerus berlaku. Janganlah hendaknya ulama-ulama kita membuat kaedah, kena di mata dipicingkan, kena di perut dikempiskan tetapi katakanlah yang hak supaya lepas tafsir terhadap kepada hal yang boleh mendatangkan syak itu.

Kita yakin Ke bawah Duli Raja-Raja Melayu jika mendapati perkara-perkara itu sebenarnya syirik jika dengan sifat baginda-baginda itu raja-raja yang beragama Islam, kita yakin beliau tidak mau melanggar perkara-perkara yang mengenai agamanya sendiri.

Pelajaran Agama di Sekolah-Sekolah Melayu di Singapura

Kementerian Pelajaran Singapura telah mengumumkan bahawa untuk menyelenggarakan pelajaran agama di sekolah-sekolah Singapura pada tahun hadapan meminta penerbit-penerbit menghantarkan contoh-contoh buku agama kepadanya, yang kemudian buku-buku itu akan disemak dan akan digunakan di sekolah-sekolah umum kerana mengajar pelajaran-pelajaran agama seperti yang dirancangkan.

Dengan pengisytiharan itu maka zahirlah suatu perkara yang boleh menerbitkan suatu kenyataan kepada umum bahawa ajaran pelajaran agama di sekolah-sekolah Melayu itu tidak mempunyai kesiapan-kesiapan yang tertentu atau tidak mempunyai suatu rangka yang disusun dengan baik supaya pelajaran yang diajarkan di situ memberi kesan dan memberi faedah kepada yang berkenaan.

Sepanjang yang kita ketahui, Kementerian Pelajaran Singapura telah melantik sebuah Jawatankuasa Penasihat kepadanya di dalam perkara menyusun pelajaran agama di sekolah-sekolah